

INUIT ATAQATIGIIT INATSIARTUNI



UPA2023/13

26.09.24.

Peter Olsen

Uunga siunnersuut: Aningaasarsianit akileraarutit pillugit Inatsisartut inatsisaannik, akileraaruserinermik ingerlatsineq pillugu Inatsisartut inatsisaannik kiisalu sulisoqarnermut akitsuut pillugu Inatsisartut inatsisaannik allannguissamut Inatsisartut inatsisaat (Aningaasaqarnermut Akileraartarnermullu Naalakkersuisoq)

Oqaaseqaat:

Inuit Ataqatigiit sanngiinnerusortatsinnik, pissakinnerusortatsinnik, akunnattumillu isertitaqartuusunik illersuinissamik pingaartitsisuunerput partiitut ilisarnaatigilluinnakkatta ilagilluinnarpaat; naatsumik oqaatigalugu kikkut tamat oqartussaaqataanerannik, inuit qanorluunniit oqarsinnaatitaanerannik, assigiinngisitaartuunermik, tamanik inissaqartutsisuunerput, minnerunngitsumillu kikkut tamat atugarissaarnissaannik qallunaatut velfærdmik taasartagaannik pingaartitsisuulluta.

Qujanarluinnartumillu nunatsinni atugarissaartorpassuarnik ulikkaarpoq. Ilaqutaariippassuaqarpoq ingerlalluartunik sulilluartunik, inuaqatigiinnilu akisussaaqataallunillu kivitseqataalluarsimasunik. Tamanna nuannaarutissaraarput tulluusimaarutissaralutigulu.

Ataasinngornermi julip aallaaqaani 2024 nal.11.42. Sermitsiaq ag.-kkut saqqummiunneqarpoq nunatsinnigooq pisiarineqarnerpaat 30-it akornanni, sodavandit, imigassat alakoornartortallit aammalu tupat tassaasut nunatsinni pisisartunit pisiarineqarnerpaasartut. Naak nioqqutissat taakku pineqartut nunarsuarmi akikinnerpaanut ilaanngikkaluartut, immaqaluunnit nunarsuarmi akisunerpaatut aallaat oqaatigineqarsinnaagaluartut, nunatsinni nioqqutissani pisiarineqarnerpaajupput. Nioqqutissanik taamatut akisuunik, ulluinnarnilu pisariaqartinnerpaanngisatsinnik annertuumik atuisoqarsimatillugu, taava aamma ima oqartoqarsinnaasarpoq; Inuiaqatigiit akornanni aningaasarsiornikkut ingerlalluartoqartoq atugarissaartoqartorlu. Pissutsit taamaanneranni; tamakku uppernarsaataannginnerpat nunatsinni ingerlalluartoqarmat, atugarissaartorpassuaqarlunilu?

INUIT ATAQATIGIIT INATSISARTUNI



taaguusersimaavarput “Nunarput Najoruminarnerulersitsigu” Tassanilu attassiinnarnissamut ineriartortitsinissamullu pilersaarut 2-mi aaqqissuusseqqinnissamut sammivik 2-ip atuutilersinneqarnissaa siunertaalluni.

Inummut ilanngaat 12.000,-nik qaffaavigissavarput 48.000,-niit 60.000,-nut. Tamanna innuttaasunut agguaqatigiisillugu ukiumut 4.320,-niit 5.280,- kr akornanni kaasarfimmioqarnerulersitsissaaq.

Sulinermut ilanngaat aaqqissuuteqqissavarput. Massakkut imaappoq kikkut tamangajammik lagkagimik agguarseqataasartussanngorlugit aaqqiisoqarnikuugaluarpoq; allaammi isertitaqqortuunut allaat aamma lagkagimik pissarseqataasartussanngortinnikuusimagaluaratsigit.

Tamatuma kingunerisimavaa inummut ataatsimut agguagassarsiassaq malunnaateqarpallaarsinnaasimanani. Ukiumullu ataasiarluni sulinermut ilanngaat tunniunneqartarsimagaluarpoq. Tamanna allanngussaaq aaqqissuuteqqittussanngorparput.

Massakkut isertitakinnerusunut akunnattumillu isertaqartunut sulinermut ilanngaat naleqqussarlugu aaqqissuuteqqittussanngorparput; tassa imaappoq ukiumut 250.000,-niit ukiumut 500.000,-it tungaanut isertitaqartunut naleqqussartussanngorlutigu. Tamanna innuttaasunut ukiumut 160.000,-nit 250.000,- tungaanut isertitaqartunut, agguaqatigiisillugu ukiumut 21.063,- missaanik kaasarfimmioqarnerulersitsissaaq. Tassa imaappoq innuttaasoq nunatsinni isertitakinnerpaajusoq qaammammut 1.700,- missaanik kaasarfimmioqalersittussanngorparput. Siunertaavoq anguniagaallunilu sulinermut ilanngaatip qaammatit tamaasa tiguneqartalernissaa, massakkutut ukiumut ataasiaannarluni tiguneqartarunnaarluni.

Oqaluttuaq takisooq naatsumik oqaatigalugu;

366.700.000,-it nunatta karsianiit innuttaasut kaasarfiinnut nuunneqartussanngorput. Tamatumalu kingunerissavaa nunatsinni isertakinnerpaat akunnattumillu isertitaqartut qaammammut 2000,- missaanik kaasarfimmioqarnerulernissaanik.

Tamannalu pissaaq ilanngaataasut ilaasa atorunnaarsinneqarneratigut, sulisitsisut akileraarutaasa 1 %-mik qaffanneqarneratigut, nunatta karsiata iluanaarutissaraluanninngaaniit aallernikkut aammalu aaqqissuusseqqinnerit aqutigalugit aningaasalersorneqartussanngussalluni.

INUIT ATAQATIGIIT INATSIARTUNI



Inuit Ataqatigiinni qineqqusaarutigisimasatta ilaat piviusunngortinneqartussanngulermat nuannaarpugut qilanaarpugullu. Naligiinnginnerujussuaq iliuseqarfigineqartussanngorpoq. Isertitakinnerpaat akunnattumillu isertitaqartut kivinneqarlutillu oqilisaaffigineqartussanngorput.

Taamaattumik taamatut tunngavilersuuteqarluta oqaluuserisassaq una akuersaarlugu aningaasaqarnermut akileraartarnermullu ataatsimiitilialiamut ingerlateqqipparput.

[Sodavand, øl og tobak er de 3 mest solgte varer i 2023 \(sermitsiaq.ag\)](https://sermitsiaq.ag)